

摘藻堂四庫全書薈要

集部

欽定四庫全書薈要卷一萬五千五百八十九

集部

誠齋集卷十二

宋 楊萬里 撰

詩

荆溪集

郡圃雪霽便有春意

臘傍梅梢盡春從水底歸  
草拳擎雪健桃糝隔年肥  
夜還鄉夢心心逐雁飛  
誰言五斗米便勝北山薇

金安四庫全書  
卷十二  
郡圃雪銷已盡惟餘城陰一街雪

陽林日暖雪全銷陰逕瓊瑤尚寸高半足斜鋪白花錦  
倩誰裁作水霜袍

晚望

天墮楸枰作稻畦啼烏振鷺當枯碁不論勝負端何似  
黑子終多白子稀

送客歸至郡圃殘雪銷盡

三日東風入萬家草間殘雪不留些兒童道是雪猶在

笑指梅花作雪花

陳能之少卿殿撰挽詩

玉立頌臺上風生憲府中  
雪霜欺兩鬢日月照孤忠  
荷橐相將紫銘旌作麼紅  
北堂萱草露應洒碧梧桐

梅花數枝簪兩小  
瓷瓶雪寒一夜二瓶凍裂  
剥出二水精瓶梅花在焉  
蓋冰結而為此也

何人雙贈水精瓶  
梅花數枝瓶底生  
瘦枝尚帶折痕在  
隔瓶照見透骨明  
大枝開盡花如雪  
小枝未開更清絕

爭從瓶口迸出來其奈堪看不堪掇人言水精初出萬  
壑時欲凝未凝如凍脂上有江梅花正盛吹折數枝墮  
寒鏡玉工割取到人間琢出瓶子和梅看至今猶有未  
凝處瓶裏水珠走來去只愁窗外春日紅瓶子化作亡  
是公

遣人探梅翟園云尚未開

傳語翟園千樹梅不應磊草索時催今年雪後悄無信  
去歲臘前強半開我欲明朝攜酒去花須連夜喚春回

東風肯報南枝否待醕東風三百盃

十二月二十一日迎春

星淡孤螢月一梳迎春早起正愁予土牛只解催人老  
春氣自來何事渠官柳野梅殘雪後金幡玉勝曉光初  
却思歸跨春山犢繭栗仍將掛漢書

己亥正月二日送李伯和提幹歸豫章

伯和來自西山西山爽氣在睫眉胸中八索貯奇古  
筆下九江走風雨君不見李家人物他家無老蚌一產

俱明珠郎罷致身已碧落衆雛爭先見頭角伯珍魁名  
北斗傍仲簡插脚鴛鴦行如何伯也袖兩手却去外臺  
作賓友荆溪病守鬢星星一見鄉人雙眼明白雲飛處  
忽心動不堪折柳還相送我自為客仍送君梅邊雪裏  
正新春還家燈火更青簡給札蘭臺未渠晚

正月三日驟暖多稼亭前梅花盛開

春被梅花抵死催今年春向去年回春回十日梅初覺  
一夜商量一併開

絕愛西湖疎影詩要知猶是未開時如今開盡渾無縫  
只見花頭不見枝

初開猶見蒂和心今日來看花滿林日照一團都是雪  
更無紅蠟與黃金

却緣臘雪勒孤芳等待晴光曬麝囊小立樹西人不會  
東風供我打頭香

春興

窻底梅花瓶底老瓶邊破硯梅邊好詩人忽然詩興來



如何見硯不見梅急磨玄圭染霜紙撼落花鬚浮硯水  
詩成字字梅樣香却把春風寄誰子

歲之二日欲遊翟園以寒風而止

歲前問尋翟園梅不知作麼不肯開歲後遣人訪消息  
春風一夜花都拆老夫聞此喜欲癲小兒終夕不成眠  
南烹北果手自飭漆樞銀瓶色相映千騎朝來填戟門  
雙旌已復指梅園東風無端動地起橫作清寒止游子  
老夫孤悶搔白頭小兒勸翁翁勿愁人言好事莫作意

雨妬風憎鬼神忌欲游不必言阻游不必計從今只揀  
天色佳走就梅花求一醉

謝陳希顏惠兔犯

東郭阿藐駝褐裳清腹不着烟火香姮娥喚入廣寒殿  
詔許搗藥不許嘗金丹煉成紫皇喜玉臼自攜雲漢洗  
偷將饑吻吸瓊漿蛻盡骨毛作仙子鬢絲吹落桂枝風  
人間封作管城公先生何許得尸解貌如枯蟾帶玄疥  
麒麟擘脯未必如耶律暉羝差不大先生錦心冰雪腸

銀鉤珠唾千萬章管城奔命困書囿阿篋漆身嬉醉鄉  
老夫去年左車脫匙抄爛飯猶夏夏太息再拜謝阿篋  
尚堪挂壁縈蛛塵一飯瞻仰齒生津

初三日遊翟園

羽衣曉謁玄元殿霜封萬屋明飛霞扶桑跳出丹砂丸  
光射半天縈紫電歸塗微暖春衫知小風不動旗脚垂  
老夫掉頭心獨喜翟園梅花招我嬉呼兒嬖姍且勃窣  
挽出譙門寒刮骨東風十里卷黃塵眼花頭眩吹倒人

劣到翟園風便止猿鶴前導花迎門  
玉林亭子絕幽絕  
江梅千樹吹香雪茂松軒裏清更清  
松風一鼎煎茶聲  
春光催柳未肯青池水借日無留冰  
殷勤犯寒我不枉  
分付勝游天豈輕主人看客眼不白  
鸚鵡傳呼餉肴核  
桃花碎片點鱸鮓紫茸堆盤擘鶉腊  
霜餘橘顆金彈香  
雪底笋芽玉版色老夫欲醉金叵羅  
穉子先唱驪駒歌  
不羞冷面對風物奈爾玉笋金柑何

多稼亭前兩株梅盛開

翟園看梅不滿眼載酒何曾傾一琰空有千株半未開  
欲剪一枝無可揀歸來却登多稼亭玉妃驟降千娉婷  
素羅衣裳濯瑤水珠宮樓閣開銀屏國香萬斛量不盡  
雪嶺諸峯互相映身騎白鳳繞瓊林肝胆透寒骨毛冷  
看來只是兩株梅如何遣儂心眼開花頭密密紛無數  
萼萼枝枝砌成樹夕陽斜照光燭天微風欲度遮無路  
君不見侯門女兒真箇癡癡髓熬酥滴北枝又不見畫  
工兔穎矜好手冰水和鉛描玉肌先生不能奄有二子

者報荅風光只有詩今夕不醉仍無歸

戲題所見

田家不遣兒牧豬老烏替作牧豬奴不羞卑冗頗得志  
草根更與豬為戲一烏驅豬作鰕鱖一烏騎豬作騏驎  
騎之不穩驅不前坐看頑鈍手無鞭人與馬牛雖各樣  
一生同住烏衣巷叱聲啞啞喙欲乾豬竟不曉烏之言  
騎者不從驅者鬪爭牛訟馬傍無救豬亦自食仍自行  
一任兩烏雙鬪爭不緣一童逐烏起兩烏頃刻鬪至死

梅花下遇小雨

偶來花下聊散策落英滿地珠為席繞花百匝不忍歸  
生怕幽芳怨孤寂仰頭欲折一枝斜自揷白鬢明烏紗  
傍人勸我不用許道我滿頭都是花初來也覺香破鼻  
頃之無香亦無味虛擬黃昏花欲睡不知被花薰得醉  
忽然細雨濕我頭雨落未落花先愁三點兩點也不惡  
未要打空花片休

落梅有歎

纔看臘後得春饒  
愁見風前作雪飄  
脫蕊收將熬粥喫  
落英仍好當香燒

郡治燕堂庭中梅花

林中梅花如隱士  
只多野氣無塵氣  
庭中梅花如貴人  
也無野氣也無塵  
不疎不密隨宜了  
旋落旋開無不好  
珠簾遣風細為吹  
畫簷護霜寒更微  
詩翁遶階未得句  
先送詩材與翁語  
有酒如澠誰伴翁  
玉雪對飲惟渠儂  
翁欲還家即明發  
更為梅兄留一月



細雨

孤悶無言獨倚門  
梅花細雨欲黃昏  
可憐簷滴不脫灑  
點點何曾離舊痕

水精膾

上饒靈山無它靈  
空山滿腹着水精  
炯然非石亦非玉  
乃是陰崖絕壑千秋萬歲之堅冰  
只知靈山有爽氣  
誰知水精有奇味  
詩人新試餐玉方解遣  
堅凝作鬆脆  
銀刀細下雪縷飛  
金盤飣出瓊瑤堆  
齒牙着處霜霰響  
殺

鯖厭後胸襟開尊前歡伯來督戰坐上嘉賓欲驚散胸  
中自有水精宮不怕醉鄉無畔岸

雨後曉起問訊梅花

前日看梅風吹倒昨日看梅雨霑帽近梅一日或再來  
遠梅隔年纔一到夜來為梅愁雨聲挑燈起坐至天明  
不知消息平安否早來問訊還疾走橫枝雨後轉清妍  
玉容洗粧濃更鮮絕似孤山半峯雪不羨玉井十丈蓮  
十事八九不如意人生巧墮天公計簿書海底白人頭

孤負江南風月秋憶昔少年命同社月裏傳觴梅影下  
一片花飛落酒中十分便罰琉璃鍾如今老病不飲酒  
梅花也合憐衰翁

壕上感春

長壕無事不耐靜若非織綃便磨鏡竹君不作五斗謀  
風前折腰也如磬先生節裏城上嬉朝游暮游不肯歸  
晴空大聲斗作惡萬鴉退飛一鴉落乃是黑風江北來  
更將黑雲頭上堆翻手為晴覆手雨自晴自雨何須怒

先生不妨且覓句挽之不來推不去坐看梅花一萬枝  
化成粉蝶作團飛紛紛掠面收不得稍稍積砌吹還稀  
落盡梅花天不管晚來許寒朝許暖一年待春春不回  
一年探梅梅不開春回今纔幾許日梅開如何頓蕭瑟  
少壯幾時奈老何落花未抵春愁多

觀小兒戲打春牛

小兒着鞭鞭土牛學翁打春先打頭黃牛黃蹄白雙角  
牧童綠蓑笠青筇今年土脈應雨膏去年不似今年樂

兒聞年登喜不飢牛聞年登愁不肥麥穗即看雲作帚  
稻米亦復珠盈斗大田耕盡却耕山黃牛從此何時閒

謝親戚寄黃雀

萬金家書寄中庭牖背仍題雙掩并不知千里寄底物  
白泥紅印三十瓶甌瓶淺染茱萸紫心知親賓寄鄉味  
印泥未開出饒水印泥一開香撲鼻江西山間黃羽衣  
純綿被體白如脂偶然一念墮世網身插兩翼那能飛  
誤蒙諸公相俎豆月裏花邊一盃酒先生與渠元不疎

兩年眼底不見渠端能訪我荆溪曲願借前籌酌醺醪  
牛尾狸

狐公韻勝冰玉肌字則未聞名季狸誤隨齊相燧牛尾  
策勲封作糟丘子子孫世世襲膏粱黃雀子魚鴻雁行  
先生試與季狸語有味其言須聽取

得小兒壽俊家書

父子初別雙淚垂別我既久忘却思忽得一書喜且悲  
恰似向來初別時汝翁在官緣索米吾兒在家勉經史

舉頭三千四百里亘山啼鳥偏入耳詩成自哦只自知  
便風不敢寄吾兒汝望白雲穿却眼若得此詩恐腸斷  
徑須父子早歸田粗茶淡飯終殘年

書莫讀

書莫讀詩莫吟讀書兩眼枯見骨吟詩箇字嘔出心人  
言讀書樂人言吟詩好口吻長作秋蟲聲只令君瘦令  
君老君瘦君老且勿論傍人聽之亦煩惱如何閉目坐  
齋房下簾掃地自焚香聽風聽雨都有味健來即行倦

來睡

春草

天欲遊人不踏塵  
一年一換翠茸茵  
東風猶自嫌蕭索  
更遣飛花繡好春

年年春色屬垂楊  
金撚千絲翠萬行  
今歲草芽先得計  
攬它濃翠奪它黃

春陰

春晴幸好却春陰  
雲意泔泔半欲霖  
日色忽開雲又合



急收碎影一簾金

小瓶梅花

梅萼纔開已亂飛  
不堪雨打更風吹  
蕭蕭只隔窻間紙  
瓶裏梅花總不知

夜坐

繡簾無力護東風  
燭影何曾正當紅  
獸炭貂裘猶道冷  
梅花不易立霜中

寒宵老眼只長醒  
蝴蝶頻催夢不成  
不是三更三四點

如何一睡到天明

燭下和雪折梅

梅兄衝雪來相見  
雪片滿鬚仍滿面  
一生梅瘦今却肥  
是雪是梅渾不辨  
喚來燈下細看渠  
不知真箇有雪無  
只見玉顏流汗珠  
汗珠滿面滴到鬚

鳩銜枝營巢樹間經月不成而去

鳩婦那知自不材  
樹陰疎處起樓臺  
可憐積木如山樣  
一桷何曾架得來

鵲營巢既成為鳩所據

乾鵲平生浪苦辛  
一年卜築一番新  
如何月下空三匝  
宅子還將住別人

上元前大雪即晴

臘前三白已奇絕  
年後六花仍作團  
纔定忽斜偏有思  
欲消還凍不勝寒  
且留大地萬銀屋  
要伴青天孤玉盤  
今歲上元君記取  
紅燈白月雪中看

郡中上元燈減舊例三之二而又迎送使客

紅錦芙蓉碧牡丹今番燈火減前番雪泥沒膝霜風緊  
也有游人看上元

北使纔歸南使來前船未送後船催元宵行樂年年事  
兒女嗔人夜不回

憶昔三衢看上元玉虹橫貫水精簾窮州今夕酸寒殺  
老眼看來自不忺

兒時行樂幾時愁老去情懷懶出遊市上人家重時節  
典釵賣釧買燈毬

不是東風巧剪裁如何春夜碧蓮開江城寂寞無歌舞  
喚得梅花勸一盃

雪後樓臺欲暮時遊人只道上燈遲月輪貼在梅花背  
錯認梅枝作桂枝

村裏風回市裏聲月中人看雪中燈滿城只道歡猶少  
不道譙門冷似冰

郡圃杏花

小樹嫣然一兩枝晴醺雨醉總相宜纔憐欲白仍紅處

政是微開半吐時得幸東風無與對主張春色更還誰  
海棠穠麗梅花淡匹似渠儂別樣奇

迴出千花合受降不然受拜亦何妨行穿小樹尋晴朶  
自挽芳條嗅暖香却恨來時差已晚不如清曉看新粧  
朗吟清露溫風句惱殺詩翁只斷腸

華堂秀才著六經解以長句書其後

河圖三畫已剩却堯典萬言猶欠着向來潛聖天何言  
六經非渠一手作杏花壇下撥不開天公更遣麒麟催

乾坤造化登青竹洙泗光芒付綠苔堂上書生真苦相  
蠹簡嚼穿渾不放屋上架屋更屋上後千萬年作何樣  
華元夜登子反牀華堂晨趨孔子堂當時浪說析骸骨  
今日覃思雕肺腸華君將身博凍餒毛穎可憐被何罪  
君不見老農驅牛耕隴頭稻雲割盡牛亦休毛穎為君  
禿盡髮問君何時放渠歇短檠青燈明復滅

上元後猶寒

雪後不妨寒較差莫教一併放千花舊來池上金絲柳

新學江西鷹爪茶

道是春工做物華  
春工元自不由它  
杏花只作去年面  
萱草別抽今歲芽

夜觀庭中梅花

霧質雲為屋瓊膚玉作裳  
花明不是月夜靜偶聞香

春夜孤坐

兒女齁齁鼻息聲  
虛堂誰伴一先生  
春寒夜靜燈花落  
數盡殘更睡不成



梅花雪後杏花風老面逢春只強紅  
詩句行來行去裏  
情懷不醉不醒中

老來覓句苦難成細把風斤鏤薄冰  
行到長廊人寂寂  
隔窗一點讀書燈

休日城上

到得荆溪鬢盡斑二年心力不曾閒  
如今歸去無餘戀  
只有梅花慘別顏

休日呼兒上古城胡床何處不隨行  
莫嫌一陣東風惡

分外教他數日晴

望中遠樹各依行  
春後新晴未斷霜  
池面得風呈皺碧  
梅鬚經雨褪危黃

多稼亭看梅

先生次第即還家  
更上城頭一望賒  
行盡荒寒無意思  
不如來此看梅花

梅花不合太爭春  
政盛開時却惱人  
試折一枝輕着手  
驚飛萬點撲衣巾

鑷白

莫把菱花鑷白髭  
勸君留取伴吟詩  
錦囊若要添新句  
繡口如何減素絲

東窓梅影上有寒雀往來

梅花寒雀不須摹  
日影橫窓作畫圖  
寒雀解飛花解舞  
君看此畫古今無

瑞香

買斷春光與曉晴  
幽香逸豔獨婷婷  
齊開忽作欒枝錦

未拆猶疑紫素馨  
絕愛小花和月露  
折將一朵插銀瓶  
今年偶述年時句  
倦倚雕欄酒半醒

燒香

小閣疎櫺春晝長  
沈烟半穗弄輕黃  
老鈴畧不知人意  
故故褰簾放出香

看畫常州圖迎新太守

畫工吮筆畫常州  
老子來看却自羞  
若遣此圖還解語  
道儂調戲幾君侯

風急落梅

梅花已是不勝癯無賴東風特地麁狼藉玉英渾不惜  
強留嬌蒂與枯鬚

探春

五日纔能一日來眼生方覺有春回向來日日頻來探  
只道園花不肯開

晚晴

風吹點滴曉簷聲雲散朦朧晚日明楊柳染絲纔喜雨

梅花泣玉却祈晴

先生老態似枯禪邂逅東風也欲顛  
纔雨便晴寒便暖  
四時佳處是春天

理髮

髮脫心知不再生  
新年底急頓星星  
城邊老柳也欺我  
春裏滿頭依舊青

晚照

閒對斜陽數隙塵  
何曾萬事一關身  
湯瓶得火自相語

金定四庫全書  
卷十二  
酒錢為人先作春

新除廣東常平之節感恩書懷

已愧雙旌古晉陵更堪一節古羊城  
偶逢舊治年頻熟忽署新銜手尚生  
山與君恩誰是重身如秋葉不勝輕  
向來百鍊今繞指一寸丹心白日明

芥蘼

此薑馨辣最佳蔬  
蓀芥芳心不讓渠  
蟹眼嫩湯微熟了  
鵝兒新酒未醒初  
棖香醋釀作三友  
露葉霜芽知幾鋤

自笑枯腸成破甕一生只解貯寒菹

正月將晦繁星滿天

兔冷蟾寒不出時羣仙無睡尚遊嬉  
可憐深夜無燈火碧玉枰前暗着碁

辭滿代者未至

一麾來此恰三年到得終更分外難  
老眼看燈渾作暈愁心得酒不成歡

試毘陵周壽墨池樣筆



舊來雞距說宣城近來墨池說毘陵不知阿誰喜柔懦  
毛穎只今泥樣軟筆頭政要挽千鈞渠自無力隨人轉  
兔尖如針利如錐方能幻出抉石猊少年免冠已禿鬢  
老去種種將奚為就中周壽差可意銳頭將軍殊解事  
銛鋒不用洮州礪剛腸頗學汲都尉先生焚香坐明窓  
中書奮髯蝟毛張願翻墨汁詩戰場先生一揮十萬行  
梅花微笑看在旁吾詩雖非雲錦章中有梅花玉雪香

春寒初晴

峭寒穿屋透衣裘  
欺得詩人兩鬢秋  
從此莫教三日暖  
花開花落却成愁

柳色

春到四經旬  
元來未見春  
柳條將軟碧  
爭獻上番新

行圃

摘杞搜枯梗  
攀花脫脆包  
蜨呈新樣粉  
柳送隔城梢

又

澹天薄日倦春遊  
蒼檜叢篁引徑幽  
忽有小風人未覺

齊花無數總搖頭

春半聞歸雁

春光深淺沒人知  
我正南歸雁北歸  
頭上一聲如話別  
一生長是背人飛

毘陵辭滿出舍添倅廳

小住丞廳更一旬  
客魂先入故鄉春  
未離鼓角聲中夢  
已是譙門外面人

寓倅廳寒夜不寐

不堪斜雨打虛窓只願晴陽送曉光自是老人眠不着  
近來春夜幾曾長樓頭吹動梅花曲夢裏猶疑燕寢香  
道是官居如客舍等閒一宿兩年強

春望

春光放盡百花房開到林檎與海棠青却子城千樹柳  
高枝猶有一梢黃

掠削嬌雲放嫩晴三朝五日即清明垂楊幸自風流殺  
莫着啼鳥只着鶯

送醫家孟良漢卿

醫家者流多盧人亦如許靖浪得名有眼何曾識內經  
有手何曾赦方兄一丸足可殺一命却道良醫逢死病  
荆溪此輩端不稀向來吾兒命如絲孟君談笑能起死  
吾兒更生一彈指我今挂帆上江西君來送我別荆溪  
贈別只有七字詩千萬珍重慰相思它年荆溪說神醫  
非吾孟君更阿誰倉公華佗何必奇

遊程園

花枝劣相姁人衣蜂子顛狂觸面皮一巷海棠千架錦  
兩堤楊柳萬窩絲

柔風軟日漸新晴  
顰白嬌紅鼎盛春  
借問主人何處去  
春光分付守園人

翟園從此即相辭  
園裏春歸我亦歸  
蜂踏殘花容易落  
蜨隨數片往來飛

上印有日代者未至

不是新人不肯來  
天教老子小徘徊  
坐看桃李繽紛落

等得醕醪爛漫開

誠齋集卷十二

謹案卷十一第六頁前八行連宵也費許多寒原  
本費訛賞據別本改

第十九頁前六行梅露堂燕詩客夜歸按宋詩鈔  
無詩字

卷十二第二頁後七行不應磊草索時催按磊草  
疑訛

第五頁後八行挽出譙門寒刮骨按挽一本作纔  
第九頁前七行玉容洗粧濃更鮮按宋詩鈔濃作



晨

第二十頁後三行方能幻出抉石猊原本抉訛校  
據別本改

賜蔭廩  
監生  
周學濫

總校官庶吉士臣張能照

校對官庶吉士臣陳文樞

謄錄監生臣周學濫

欽定四庫全書薈要

集部

誠齋集卷十三

四

詳校官助教臣謝登雋



欽定四庫全書薈要卷一萬五千五百九十

集部

誠齋集卷十三

宋 楊萬里 撰

西歸集

初離常州夜宿小井清曉放船

攔街父老不教行  
出得東門已一更  
一事新來偏可意  
夢中聞打放船鉦



晨炊只煮野蔬湯更揀鮮魚買一雙病眼未能禁曉日  
西窓莫閉閉東窓

春旱愁人是去年如今說着尚心酸篙師莫遣船遲着  
見說蘇州好牡丹

雨中遠望惠山

準擬歸時到未遲歸時不到悔來時惠山不識空歸去  
枉與常州作住持

詩人也是可憐生不及穿雲度水僧不是惠山看不見

只教遙見不教登

酌惠山泉瀹茶

錫作諸峰玉一涓  
麴生堪釀茗堪煎  
詩人浪語元無據  
却道人間第二泉

舟中雨望

雨裏船中只好眠  
不堪景物妬人閒  
岸如玉案平鋪却  
餽飮真山作假山

船窓深閉懶看書  
獨倚船門撚白鬚  
雨共長河織青錦

金錢暈上滴真珠

曉經潘葑

油窗着雨光不濕東風忽轉西風急蓬聲蕭蕭河水溢  
牽船不行人却立雨中篙師風墮笠潘葑未到眼先入  
岸柳垂頭向人揖一時喚入誠齋集

惠山雲開復合

二年常州不識山惠山一見開心顏只嫌雨裏不予細  
髣髴隔簾青玉鬟天風忽吹白雲拆翡翠屏開倚南極

政緣一雨染山色未必雨前如此碧看山未了雲復還  
雲與詩人偏作難我船自向蘇州去白雲穩向山頭住  
泊舟無錫雨止遂遊惠山

天教老子不空回船泊山根雨頓開歸去江西人問我  
也曾一到惠山來

出惠山遙望橫山

三日橫山反覆看慙慙送我惠山前常州更在橫山外  
只望橫山已杳然



舟過望亭

常州盡處是望亭已離常州第四程  
柳線絆船知不住却教飛絮送儂行

雨罷風迴花柳清忽然數點打窗聲  
遊蜂誤入船窗裏飛去飛來總是情

此去蘇州半日期歸心長是覺船遲  
一村柳暗知何處兩岸草青無了時

將近潯墅望見虎丘

澣墅人家遠樹前  
虎丘山色夕陽邊  
石橋分水入別港  
茆屋垂楊依釣船

舟中晚酌

竹陵春酒絕清嚴  
解割詩腸快似鎌  
雪藕逢暄偏覺爽  
鵝梨欲爛不勝甜

一日寒暄自不同  
繡簾下却護輕風  
楊花可是多情思  
飛入船中落酒中

泊船百花洲登姑蘇臺

二月盡頭三月初繫船楊柳拂菰蒲姑蘇臺上斜陽裏  
眼度靈巖到太湖

客裏逢春了不知牡丹刺買十來枝東風動地從渠惡  
吹盡楊花無可吹

舟中小雨

漠漠輕寒粟脫膚醅醖半落牡丹初顛風無賴難拘管  
小雨多情為破除半世光陰行路裏一年春事客愁餘  
浙西尚遠江西在何日漳濱買白魚

從范至能參政遊石湖精舍坐間走筆

孤塔鷗邊迥千巖鏡裏看折花倩人揷摘果護窻寒不  
是無相識相從却是難歸舟望精舍已在白雲端

震澤分波入垂虹隔水看何須小風起生怕牡丹寒政  
坐諸峯好端令落筆難催人理歸棹落日許無端

夜飲周同年權府家

老趁漁船泊館娃月明夜飲故人家春風吹酒不肯醒  
嚼盡醪醕一架花

再登垂虹亭

紅塵不解送詩來  
身在烟波句自佳  
銀漢光中有詩客  
玉虹背上曳芒鞋

宿醒作惱未惺鬆  
一對湖光酒病空  
身到吳中無好處  
三年兩度上垂虹

長年三老不須催  
且據胡床未擬回  
白晝驚人星滿地  
日光碎處萬波來

已過吳江阻風上湖口

五日姑蘇一醉中  
醉中看盡牡丹紅  
阻風只怕松江渡  
過了松江卻阻風

南風捲水入湖去  
落盡波痕不復回  
更被網船礙歸舫  
一船過盡一船來

夜泊平望終夕不寐

船中新熟睡難成  
聽盡漁舟掠水聲  
不分兩窻窻外月  
如何不為別人明

櫻桃湖裏月如霜  
偏照征人寸斷腸  
醉裏不知家尚遠

夢回忽覺路初長

一生行路便多愁  
落得星星兩鬢秋  
數盡歸程到家了  
此身猶未出蘇州

小泊梅堰登明孝寺

泊舟梅堰日微昇  
一徑深深喚我登  
隨分垂楊兼老檜  
備員野寺更殘僧

湖州三里橋取道德清

浙西只欠到湖州  
三里橋頭轉却舟  
不到湖州妨底事

不如元不到橋頭

宿湖甫山

夜泊湖甫山綠楊護危堤迅雷將殘雨似猛竟復微曉  
月解風纜熟睡初不知起來問宿處千山翠相圍霽峰  
有剩靄旭溪無停輝遠樹蘆外出若與船爭馳多情東  
林塔寸步不相離後送欣已遠前迎復在茲不知塔意  
厚為復船行遲誰能仆此塔庶不淹吾歸猶感夜來雨  
政作朝涼資



過雪川大溪

菰蒲際天青無邊只堪蓮蕩不堪田中有一溪元不遠  
摺作三百六十灣政如綠錦地衣上玉龍盤屈於其間  
前船未轉後船隔前灣望得到不得及至前灣到得時  
只與後灣纔咫尺朝來已度數百縈問知德清猶半程  
老夫乍喜權夫悶管有到時君莫問

雪溪

道場山背是吳興只不教人到德清雪水相留無別計

却將溪曲暗添程

春盡舍舟餘杭雨後山行

前夕船中索簟眠今朝山下覺衣單  
春歸便肯平平過須做桐花一信寒

樹樹低桑不要梯溪溪新漲總平堤  
杜鵑知我歸心急林外飛來頭上啼

新竹

東風巧弄補殘山一夜吹添玉數竿  
半脫錦衣猶半着

籜龍未信沒春寒

轎中絕句

雪洗林花頰金接隴麥髯捲簾雙眼遠隔樹一峰尖

晨炊白昇山

俗傳葛仙翁於此白日昇天故名

千峰為我旋生妍我為千峰一灑然雲掠石崖啼鳥樹  
雨添山澗落花泉心知童僕多飢色目斷茆簷半穗烟  
只道晨炊食無肉竹根斤笋兩三錢

晚憩富陽

苔溪到得富春灘  
度綠穿青半日間  
未出浙西心已喜  
眼中初見浙東山

春餘客裏政無聊  
忽報潮頭雪樣高  
急喚清空竹林酒  
旋嘗梅子與櫻桃

富春登舟待潮回文

山接江清江接天  
老人漁釣下前灘  
寒潮晚到風無定  
船泊小灣春已殘

小舟晚興

窮蓬舊屋雨聲乾  
蘆簌新簷暖日眠  
枕底席邊俱綠水  
脚根頭上兩青天

人在非晴非雨天  
船行不浪不風間  
坐來堪喜還堪恨  
看得南山失北山

潮痕初落水猶肥  
雨點纔來已復微  
半濕岸沙危欲落  
牽船稚子去如飛

一船在後忽攬前  
前後篙師各粲然  
山入春來肥更秀  
向人依舊聳雙肩

明發窄溪晚次嚴州

夕照落帆烏石灘  
朝來解纜窄溪邊  
篙師好語君知否  
一日風行兩日船

過橫山塔下

六年三度過蘭溪  
總是殘春首夏時  
最感橫山山上塔  
迎人東去送人西

過金臺天氣頗熱

江陰山翠借朝涼  
晚日晴波挾暑光  
舊說長江無六月

暮春已是不禁當

日晒船篷四面炊幾時却得出船時江西未到何須恨  
且到三衢也是奇

入到船中氣鬱蒸出來船外日侵凌綠波欲沸清何在  
青蓋張來似不曾

是日舟中張青蓋亦不涼云

宿潭石步

三更無月天正黑電光一掣隨霹靂雨穿天心落蓬脊  
急風橫吹斜更直疎篷穿漏濕床席波聲打枕一紙隔

夢中驚起眠不得攬衣危坐三歎息行路艱難非不歷  
平生不曾似今夕天公嚇客惡作劇不相關白出不測  
收風拾雨猝無策如何乞得東方白垂頭縮脚正偏仄  
忽然頭上復一滴

過安仁市得風掛帆

明發山溪一雨餘昨來暑氣半分無何人道是三衢遠  
挂起東風十幅蒲

西望柯山正蔚藍衢州只在此山南却愁路盡風猶剩



回納清風與破帆

舟中戲題

花處青山柳處溪  
新來宿處舊曾炊  
到家失却行程歷  
只檢西歸小集詩

上章戴灘

脫巾枕手仰哦詩  
醉上諸灘總不知  
回看他船上灘苦  
方知他看我船時

三月二十七日送春絕句

只餘三日便清和儘放春光莫恨它落盡千花飛盡絮  
留春肯住欲如何

春盡感興

春事匆匆掠眼過落花寂寂奈愁何故人南北音書少  
野渡東西芳草多荀借一風爭作竹燕分數子別成窠  
青燈白酒長亭夜不勝孤舟兀綠陂

四月一日三衢阻雨

無朝無夕雨翻盆村北村南水接天斷却市橋君莫笑

前頭野渡更無船

小詩苦雨當雲戕寄似南風一問天  
漏得銀河乾見底  
却將什麼作豐年

明發三衢

拔盡新秧插盡田出城一眼翠無邊  
不關雨水愁行客  
正是年年雨水天

衝風破雨正愁人愁得心情沒半分  
何處吹來好消息  
諸峰放散夜來雲

雲欲開時又不開  
問天覓陣好風催  
雨無多落泥偏滑  
溪不勝深岸故頽

插秧歌

田夫拋秧田婦接小兒  
拔秧大兒插笠是兜鍪  
蓑是甲雨從頭上濕到脚  
喚渠朝餐歇半霎  
低頭折腰只不答  
秧根未牢蒔未匝  
照管鵝兒與雛鴨

明發平坦市

花飛滋曉寒  
葉坼新野聽  
萬象宿雨餘  
潔齊無欠淨  
霽

曦耿欲吐遠峰忽復暝林廬居者誰戶與碧山映薔薇  
上木末不架得初性彼卧晏未興我征漂靡定惛然懷  
吾廬花竹幽更盛茲焉獨足羨自視不差勝顧瞻江之  
西心速路逾賔但聞前溪水盡還舊沙徑

晨炊江山縣驛

聞道常山水壯哉問途何惜小紆迴平生不到江山縣  
臨老須教作一來

過景星山山頂一名孤立又名突星山

山頭孤立玉伶俦  
天上何年墮景星  
四面萬峰非不峻  
如何只是一峰青

江山道中蠶麥大熟

衢信中央兩盡頭  
蠶麤今歲十分收  
穗初黃後枝無綠  
不但麥秋桑亦秋

黃雲割露幾肩歸  
紫玉炊香一飯肥  
却破麥田秧晚稻  
未教水牯卧斜暉

新晴戶戶有歡顏  
晒蠶攤絲立地乾  
却遣縹車聲獨怨

今年不及去年閒

午憩

嫩綠桐陰夾道遮  
爛紅野果壓枝斜  
日烘細草香無價  
況有三枝兩朶花

晴邊雨後麥秋時  
風色輕輕日色微  
已隔深溪仍蘸水  
却教人折野薔薇

過髦塘渡

雪浪無堅岸  
金沙有退痕  
斷橋猶半板  
嫩樹欲枯根  
為

問新來漲今年第幾番昨來愁此渡已濟不堪論

江郎峰三石山在江山縣南三十五里禮賢  
鎮望之極正里人又呼為郎峰

走徧名山脚不停見渠令我眼偏明郎峰好處端何似  
筍剝三竿紫水精

轎中望泛仙山

上却籃輿捲却簾曉寒旋索熟衣添孤松已自三千丈  
更在仙山第一尖



度小橋

危橋度中半深溪動人心欲返業至此將進眩下臨已  
涉尚回顧溪水知幾深誰能大此橋以安往來人

小憩二龍爭珠蓋兩長嶺夾一圓峰故名自  
此出官路入山路云

田路直復縈肩輿斜還正如何晴三日猶自滑一逕缺  
岸有危棧方軫無穩興不跌先獨驚稍坦深自慶肯信  
坐者安不及行者病昨來九軌途可思不可更忽逢兩

蒼虬爭此一照乘頗欲問故老雙爭誰孤勝水聲亂人  
語一辭無真聽輕風從秧疇衆綠久未定崎嶇從此始  
辛苦何時竟

早炊楊家塘

枯樹藤為葉遙峰石作鬟如何每行客不勸自加餐浙  
界殘零處江東咫尺間炊烟戀茅屋飛出却飛還

四月四日午出浙東界入信州永豐界

外面千峰合中間一逕通日光自搖水天靜本無風村

酒淳春綠林花倦午紅  
莫欺山堠子知我入江東

過蘇巖

仰望蒼巖高更深巖中佳處着禪林  
瓊泉萬仞峯頭落一滴泉聲一醒心

松陰小憩

不但先生倦不蘇僕夫也自要人扶  
青松數了還重數只是從前八九株

宿靈鷲禪寺

暑中帶汗入山中霜滿風篁雪滿松只是山寒清到骨  
也無霜雪也無風

初疑夜雨忽朝晴乃是山泉終夜鳴流到前溪無半語  
在山做得許多聲

初五日晚寒浙人謂之蠶寒蓋麥秋寒也

歲歲春寒欲去時麥牽蠶惹不教歸早知今晚猶差冷  
未肯疎他舊袂衣

道傍小憩觀物化

蝴蝶新生未解飛  
鬚拳粉濕睡花枝  
後來借得風光力  
不記如癡似醉時

山行

山行兩日厭荒涼  
田少山多多更長  
一望不曾虧碧草  
半分何似借青秧

晨炊玉田聞鶯觀鷺

曉寒顧影惜金衣  
着意聽時不肯啼  
飛入柳陰多處去  
數聲只許落花知

清溪欲下影先翻  
隻鷺還將雙鷺看  
綠玉脰長聊試淺  
素瓊裳冷不禁寒

過石磨嶺皆創為田直至其頂

翠帶千根束翠顛  
青梯萬級拾青天  
長淮見說田生棘  
此地都將嶺作田

將至永豐縣

清和天氣半陰晴  
下轎攜筇取次行  
不奈永豐山色好  
雲窺霧看未分明

永豐驛逢故人趙伯庭過敘

同官潁水總青春消息中間兩不聞道我未衰君莫戲  
不須看我只看君

出永豐縣石橋上聞子規

花愁月恨只長啼雨夕風晨不住飛自出錦江歸未得  
至今猶勸別人歸

怨笛哀箏總不如一聲聲徹九天虛若逢雨夜如何聽  
幸得花時莫管渠

入上饒界道中野酴醾盛開

千朵齊開雪面皮一芽初長紫蘭枝一芽來歲還千朵  
誰見開花似雪時

走上松梢繞却他為他滿插一頭花未論似得酴醾否  
且是幽香野得些

憩冷水村道傍榴花初開

舊羅縠薄剪薰風已是花明蒂亦同不肯染時輕着色  
却將密綠護深紅



晚雲釀雨

昨來一雨斷人行  
恰到晴時雲又生  
梅月如何休得雨  
麥秋却是要他晴

只消舊雨已驚心  
莫遣新晴更作陰  
路轉綠荷依翠柳  
眼隨白鳥度青林

誠齋集卷十三

欽定四庫全書薈要卷一萬五千五百九十一

集部

誠齋集卷十四

宋 楊萬里 撰

詩

西歸集

詩情

只要雕詩不要名老來亦復減詩情虛名滿世真何用  
更把虛名賺後生



四月十三日渡鄱陽湖

湖心一山曰康郎山其狀如蛭浮水上

泊舟鄱君側風雨至夜半求濟敢自必苟安固所願孤  
愁知無益暫忍復永歎夜久忽自睡倦極不知旦舟人  
呼我起順風不容緩半篙已湖心一葉恰鏡面仰見雲  
衣開側看颿腹滿天如琉璃鍾下覆水晶盃波光金汁  
瀉日影銀柱貫康山杯中蛭廬阜帆前幔豁然地無蒂  
渺若海不岸是身若虛空御風浮汗漫初憂觸危濤不  
意拾奇觀近歲六暄涼此水三往返未涉每不寧既濟

輒復玩游倦當自歸非為猿鶴怨

已至湖尾望見西山

好風穩送五湖船萬頃銀濤半霎間已入江西猶未覺  
忽然對面是西山

蘆荻中間一港深萋萋如柱不成簪正愁半日無村落  
遠有人家在樹林

千里都無半點山如何敢望有人烟不教遠樹遮攔却  
蘆荻生來直到天

送鄉人余文明勸之以歸

一別高人又十年霜筋雪骨健依然  
席門未害車多轍斗酒尚能詩百篇  
蒼狗白衣俱昨夢長庚孤月自青天  
故山松菊平安在何日歸歟解釣船

送王季山主簿省親樞府

六館名流王季山十年風雨短檠寒  
不曾文字饒羣子勉為庭闈就一官  
伯也騰身紫極上叔兮着眼白雲端  
會當再奏河東賦名姓從當揭榜看

豫章光華館苦雨

阻水水不退苦雨雨不收天不遣人行我豈願此留客  
間亦何娛勝踐或消憂西山天下奇東湖塵外幽駕言  
欲一往雨濕且復休懷哉滕王閣咫尺城南阪舉武便  
可至登臨亦無由平陸幻成海高屋瞬失樓南浦水正  
長何時放歸舟

葉教授鎬乃翁致政一百三歲屢加封仍錫  
朱銀取誥命之詞名其堂曰介壽

蘭玉初攀桂朱銀降自天堂中有一老物外百三年紫  
誥行充棟霜毛儘滿顛仁人元自壽端不羨臞仙

秋蟲

蟬哀落日恰纔收蛩怨黃昏正未休催得世人頭總白  
不知替得二蟲愁

病中感秋時初喪壽隄子

臨曉睡偏重不知窗已明高梧下清露宿鳥有寒聲愁  
豈關鬚事秋來添雪莖病身仍哭子併作老來情

秋熱

多難幽懷慘不舒  
秋風殘暑掃難除  
一生最怕西窓日  
長是酴醾架子疎

年年極暑與秋期  
日日秋陽在暮時  
我自愁吟無意思  
蟬聲移近入簷枝

夜坐

夜永留清坐  
詩臞稱病容  
溪鳴風處竹  
月濕露中松  
喜事何曾夢  
燈花誑殺儂  
欲歸歸已得  
歸得却無悰



中秋病中不飲二首後一首用轆轤體

去年兩浙浙西州今夕南溪溪上頭滿着玻璃一盆水  
洗開玉鏡十分秋病來不飲非無酒老去追歡總是愁  
自笑獨醒仍苦詠枯腸雷轉不禁搜

無風無雨併無雲今歲中秋儘十分畢竟冰輪誰為轉  
碾穿玉宇不生痕坐看兒輩紛然飲也遣先生半欲醺  
自是清尊負明月不關明月負清尊

中秋月長句

西山走下丹砂丸東山飛上黃金盤  
徑從碧海升青天半濕尚帶波濤痕  
初輝淡淡寒不動月華猶輕桂華重  
黃羅團扇暗花文感金突起雙龍鳳  
須臾正面天中央銀鈺退盡向來黃  
乾坤鎔入冰壺裏萬象都無只有光  
平生愛月愛今夕古人與我同此癖  
去年中秋天漆黑今年中秋月雪白  
先生舊不論升斗近來畏病不飲酒  
月下醒眼搔白首明年月似今宵否

秋雨初霽

松竹陰寒分外蒼  
芭蕉花濕夢中香  
抽身朱墨塵埃裏  
入眼山林氣味長  
今日更無秋熱苦  
曉晴猶帶雨餘涼  
却將白髮三千丈  
綵作霜絲補錦囊

子上弟折贈木犀數枝走筆謝之

我家殊未有秋色  
君家先得秋消息  
西風夜入小池塘  
木犀漏洩月中香  
一粒粟中香萬斛  
君看一梢幾金粟  
門前雙桂更作門  
路人知是幽人屋  
數枝寄我開愁眉  
欲狀黃金無好詩  
君到廣寒折一枝  
香無兩般君自知

西齋舊無竹子歸自毘陵齋前忽有竹滿庭  
蓋牆外之竹迸逸而生此也喜而賦之

平生取友孤竹君館之山崦與卜隣風襟月珮霜雪身  
只談風節不論文我開西齋對清潤每嫌隔窓不相近  
別來桃李一再花我長在外君在家歸來西齋挂窓處  
此君忽在窓前住遠牆檢校無來路此君來路從何許  
向來先生初出去遣猿看牆鶴看戶如何鶴睡眠未開  
此君一夜過牆來明朝穉子滿庭砌豹文玉骨龍苗裔

春風吹墮錦衣裳  
仰看青士冠劒長  
先生豈惜窓前地  
與君同醒復同醉

病後覺衰

病着初無惱  
安來始覺衰  
人誰長健底  
老有頓來時  
山意淒寒日  
秋光染瘦詩  
小松能許劣  
學我弄吟髭

昨日訪子上  
不遇徘徊庭  
砌觀木犀而歸  
再以七言乞數枝

昨攜兒輩叩雲關  
繞遍巖花恣意看  
苔砌落深金布地

水沈蒸透粟堆盤寄詩北阮賒秋色供我西窓當晚食  
小朶出叢當折却莫教折破碧團藥

芭蕉

骨相玲瓏透入窓花頭倒挂紫荷香繞身無數青羅扇  
風不來時也不涼

瀟瀟灑灑復婷婷一半風流一半清不為暑窓添午蔭  
却來愁枕作秋聲

簷牙窓額兩三株只欠王維畫雪圖開卷不題元字脚

碧窻團蠟有如無

拒霜花

木蕖何似水芙蓉同箇聲名各自都風露商量借膏沐  
臙脂深淺入肌膚喚回春色秋光裏饒得紅粧翠蓋無  
字曰拒霜渾不惡却愁霜重要人扶

不寐

老來只願酒難醒酒力纔醒夢便驚露滴新寒欺瘦骨  
宦遊如夢記平生深山五夜雞吹角落月一窻鵝打更

等待曉光雕好句曉光未白句先成

非關枕上愛吟詩聊復銷愁片子時老眼強眠終不夢  
空腸暗響訴長飢翻來覆去體都痛乍暗忽明燈為誰  
只道晝長無那着夜長難禁不曾知

暗蟲夜啼不肯停直從黃昏啼到明不知討論底事着  
為復怨嗟誰子生至竟終宵千萬語真實只是兩三聲  
唧唧唧復唧唧此外何言君試聽

初聞一犬兩犬聲次第遠近雞都鳴今夕明朝何日了



南村北巷幾人行忽思春雨宿茆店最苦僕夫催去程  
是時懶起惜殘睡如今不睡愁獨醒

寄題保靜菴

劉賢礪取司馬溫公無為贊中語名其菴謝昌國記之治心以

正保躬以靜溫公語也

洙泗九淵閔玄珠没人下取龍怒鬚迂叟勃興章甫徒  
刺手一探珠炯如治心保躬四顆餘一顆光照千乘車  
艮齋豎起塵拂子保靜居士一笑喜試看此珠狂波底  
波自拍天珠在水江南江北起秋風菴前菴後吹霜松

居士焚香於其中手揮五絃送歸鴻

戲題常州草蟲枕屏

黃蜂作歌紫蝶舞蜻蜓蚱蜢如風雨先生晝眠紙帳溫  
無那此輩喧夢魂眼中了了華胥國蜂催蝶喚到不得  
覺來忽見四摺屏野花紅白野草青勾引飛蟲作許聲  
何緣先生睡不驚

子上持豫章畫扇其上牡丹三株黃白相間  
盛開一貓將二子戲其傍

暄風暖景政春遲  
開盡好花人未知  
輸與狸奴得春色  
牡丹香裏弄雙兒

和李與賢投贈之韻

雲海不教鵬怒飛  
玉階也合鳳來儀  
如何天下李元禮  
未遇人間鍾子期  
夜誦子虛無路達  
夢生春草只心知  
願君更奏三千牘  
金榜青衫染柳絲

李與賢來訪自言所居幽勝甚似剡溪因以  
似剡名其菴出閒居五詠因次其韻

玉壺冰段露金莖未抵閒居五詠清休道曹詩成七步  
不須三步已詩成

山似剡溪溪似油人如詩句句如秋無邊春裏花饒笑  
有底忙時草喚愁

溪上新橋似鳳林殘風剩雨做秋陰先生小試南風手  
寫得一川山水音

見說幽居繞萬松栽梅能白桃能紅人行剡曲溪山裏  
家住輞川圖畫中

漫浪江湖天一方  
故人不見兩三霜  
對床說盡平生話  
黃葉聲中秋夜長

寄題李與賢似剡菴

四明狂客一茅屋  
敕賜剡川纔一曲  
安福詩人李與賢  
大書似剡山扉前  
我曾着脚勾踐國  
奉詔昭陵省松柏  
是時八月欲半頭  
鏡明不是人間秋  
稽山影落水晶闕  
荷花露滴波中月  
李真茅屋荒蒼苔  
古木哀猿啼禹穴  
今君結屋阿那邊  
匹似剡川若箇言  
我到剡川君未到

似和不似然不然君不見興公舊草天台賦元不曾識  
天台路一俯仰間已再升何用瘦藤與芒屨

試蜀中梁杲桐烟墨玉版紙

木犀煮泉漱寒齒殘滴更將添研水子規鄉裏桐花烟  
浣花溪頭瓊葉子先生老去怯苦吟琢無肝肺嘔無心  
芙蓉在左木犀右漫無七言真藉手秋光一點入骨清  
有筆如椽描不就先生不瘦教誰瘦

蕙花初開

幽人非愛山出山將何之山居種蘭蕙歲寒久當知初  
藝止百畝餘地惜奚為先生無廣居千巖一茅茨四面  
祇藝蕙中間纔置錐銳綠分宿叢脩紫擢幼枝孤幹八  
九花一花破初蕤西風淡無味微度成香吹燈夢得幽  
馥月寫傳靜姿我欲掇芳英和露充晨炊忽然惻不忍  
環玩真忘飢豈無衆花草不願秋卉遲種時亂不擇歲  
晚悔可追

木犀落盡有感

一歲秋香又一空落英顚顚怨西風開時占斷西風晚  
豈念荷花脫病紅

姮娥收去廣寒秋太息花中無此流花品已高香更絕  
却緣韻勝得消愁

秋蠅

秋蠅知我正哦詩得得緣眉復入髭欲打羣飛還歇去  
風光乞與幾多時

白魚羹戲題



秋水寒魚白錦鱗  
薑花棖實獻芳辛  
東坡玉糝真窮相  
得似先生此味珍

松聲

吟詩口角恰微鳴  
喚得風從月脇生  
端為先生醒醉耳  
遶山搜得萬松聲

寄題邵武張漢傑運幹萬卷樓

書生都將命乞書  
願身化作蠹書魚  
蠹魚生得針來大  
日啖銀鈎三萬箇  
書生一腹無十圍  
經炊史酌不曾飢

君家一編本黃石積書至今與山齊玉川搜腸纔一半  
鄴侯插架端無羨如何萬卷樓上人却去黃鶴樓前作  
賓贊

戲筆

野菊荒苔各鑄錢金黃銅綠兩爭妍天公支與窮書客  
只買清愁不買田

我詩只道更無題物物秋來總是詩着意染鬚玄尚白  
梳頭得蟲素成緇

飯罷散策遇細雨

秋暄團扇尚堪攜  
病脚朝來健似飛  
偶到溪頭晴喚出  
未窮山頂雨催歸

極知秋旱已難醫  
所喜陰雲忽四垂  
畢竟不成簷半滴  
辛勤枉費雨千絲

重九日雨菊花未開用輓轡體

良辰巧與賞心違  
四者難并自古稀  
恰則今年重九日  
也無黃菊兩三枝  
閉門幸免吹烏帽  
有酒何須望白衣

正坐滿城風雨句平生不喜老潘詩

西齋睡起

小睡西齋聽雨涼竹雞聲裏夢難長  
開門山色都爭入只放青蒼一冊方

讀陳蕃傳

仲舉高談亦壯哉白頭狼狽只堪哀  
枉教一室塵如積天下何曾掃得來

銅雀硯

摸索陶泓不忍研阿瞞故物尚依然浪傳銅雀簷間瓦  
恐是金鳬海底甄

黃雀食新

鵝黃染線織秋衣楊柳吹綿細細披詩債被渠渾索盡  
醉鄉邀我不容歸

侯門信口總稱珍只見陳人不見新三日荔枝香味變  
沉開醬瓿拂蛛塵

夜寒獨覺

兒啼驚覺夢中身恰則華胥正問津脚到五更偏作冷  
老來萬事不如人若無窓月誰相伴聽盡雞聲不肯晨  
尚有布衾寒似鐵無衾似鐵始言貧

雨晴得毘陵故舊書

雀聲只喜晚晴新不管畦蔬雨未勻日與山光弄秋色  
風將竹影拂窓塵多時浙右無消息忽有書來問老人  
知我近來頭白盡寒暄語外更情親

憂患感歎

醉裏還多感醒來却更愁醉醒多不是愁感幾時休

又

老去情懷已不勝愁邊災患更相仍胸中莫著傷心事  
東處消時西處生

霜曉

荒荒瘦日作秋暉稍稍微暄破曉霏只有江楓偏得意  
夜接霜水染紅衣

寄題蕭邦懷步芳園

羣鶯亂飛春晝長極目千里春草香幽人自煮蟹眼湯  
茶甌影裏見山光欣然藥圃聊步屨戲隨蜜蜂與蝴蝶  
楊花糝逕白于雪桃花夾徑紅于纈

慶長叔招飲一杯未醕雪聲璫然即席走筆  
賦十詩

晚飲西隣大阮家天風吹雪入簷牙呼僮淨掃青苔地  
莫遣纖塵浣玉花

長廊盡處繞梅行過盡風聲得雪聲醉裏不愁飄濕面



自舒翠袖點瓊英

老手那知鬢却凋  
忍寒拚命看珠跳  
却嫌地暖無冰凍  
恰則飛來恰則消

梅花得雪更清妍  
折入燈前細撚看  
下却珠簾教到地  
橫枝太瘦不禁寒

雪正飛時梅正開  
倩人和雪折庭梅  
莫教顫脫梢頭雪  
千萬輕輕折取來

急雪穿簾繞螭燈  
梅花微笑古銅瓶  
朔風惡極驚人殺

吹倒琉璃六曲屏

南烹北果聚君家  
象箸冰盤物物佳  
只有蔗霜分不得  
老夫自要嚼梅花

不是今朝雪不清  
只愁清殺老書生  
不知落盡幾多雪  
做盡北風無限聲

酒香端的似梅無  
小摘梅花浸酒壺  
莫遣南枝獨醒着  
一杯聊勸雪肌膚

燕寧軒裏集羣仙  
薄宦歸來又兩年  
梅影舞風風舞雪

勸人何苦怯金船

糟蟹六言

霜前不落第二糟餘也復無雙一腹金相玉質兩螯明  
月秋江

別業拋離水國失身墮在糟丘莫笑草泥郭索策勲作  
醉鄉侯

克信弟坐上賦梅花二首

對酒初驚髮半華折梅還覺興殊佳如何屋角西南月

只照梢頭一兩花自是向來香寂寞不須更道影橫斜  
北枝別有春無價和靖何曾覓得些

月波成露露成霜借與南枝作淡粧寒入玉衣燈下薄  
春撩雪骨酒邊香却于老樹半枯處忽走一梢如許長  
道是疎花不解語伴人醒醉替人狂

德遠叔坐上賦肴核

糟蟹

橫行河海浪生花糟粕招邀到酒家酥片滿螯凝作玉

金穰鎔腹米成沙

牛尾狸

瓊瑤風骨褐衣裘  
野果初紅玉露秋  
僧孺喚渠登榜尾  
季狸只合隱山頭

焯菜

虀白文辭粲受辛  
子牙高祖芥為孫  
勸君莫謁獨醒客  
只謁高陽社裏人

蜜金橘

風餐露飲橘洲仙  
胸次清于月樣團  
俠客偶遺金彈子  
蜂王撚作菊花鈿

藕

荷衣芰製雪為容  
家住雲烟太華峰  
外面看來真璞玉  
胸中雕出許玲瓏

人面子

喜時能笑醉能歌  
眉映青山眼映波  
舊日美如潘騎省  
只今瘦似病維摩

糖霜

亦非崖蜜亦非飴青女吹霜凍作冰透骨清寒輕着齒  
嚼成人迹板橋聲

銀杏

深灰淺火略相遭小苦微甘韻最高未必雞頭如鴨脚  
不妨銀杏伴金桃

送談命曾南翔

官職牽人也可憐老來那更問行年渠儂解事無他語

道我慈親壽八千

今年見說也無錐政坐談天泄密機舉世近來憎直語  
貴人剩許未為痴

題孫舜俞府判石圖

廬陵治中孫昌言字舜俞居越之諸暨縣作祭  
享於龜浦雞冠山先龍圖之塋得石剖之中有  
文如松桂枝葉可數圖之以示士大夫賦詩者  
甚衆來求予詩因為賦之



雞冠山青龜浦碧松桂捎雲三萬尺何年星竇化為石  
風吹未凝冰玉色仙人擘開光燭天山下人家夜不眠  
松花桂子落如雪飛入石中堅似鐵石中種樹人不知  
石中生樹人始奇君不見只今瑞圖滿四海騷人詩卷  
牛腰大

過周陂江

溪暖無冰可得消清波白石小魚跳忽逢寸碧翩然起  
翡翠驚飛上柳條

送談星辰許季升

許子儒冠恐誤身如今投筆說星辰  
未須道我何時貴且道何時子脫貧

聯珠合璧轉璇霄也被星家不見饒  
災曜元來怯檣杪福星不是背簞瓢

紀羅楊二子遊南嶺石人峰

吾弟廷弼與羅惠卿遊石人峰幾為虎所得  
嘗為予道其事因作長句紀之

二子同遊石人峰深行翠篠黃茅中初嫌微逕無人蹤  
行到半嶺徑亦窮來時猶自聞雞犬且行且語不覺遠  
上頭無梯下無岸前頭難盡後復深忽有笛聲出暗林  
草根一把牛骨骼血點濺地驚人心二子相看面無色  
疾趨山後空王宅野僧聞此叫絕天拊破禪床推倒壁  
荒山豈有吹笛聲乃是卧虎鼻息鳴二子歸來向儂說  
猶道茲遊最清絕茲遊清絕豈不佳二子性命如泥沙

題黃辰吉愚齋

聖門如天不可梯諸子欲以智取之杏壇獨立無箇事  
只有回愚也大奇吾鄙少年子黃子問津陋巷參顏氏  
只今此事冷如漿來年八月槐花黃

寄題萬安縣劉元襲橫秀圖

玉簪成陣雪成堆秀氣橫空撥不開  
楚岫蒼寒五雲外  
贛江白練九天來烟銷日出皆詩句  
月色波聲喚夢回  
早晚攜家過高閣寄詩聊當一枝梅

廷弼弟坐上絕句

黃雀初肥入口消玉醅新熟得春饒主人更恐香無味  
沈水龍涎作伴燒

十二月二十七日大雪中過吉水小盤渡西

歸

風卷寒江浪濕天斜吹朔雪忽平船碧琉璃上瓊花裏  
獨載詩人孟浩然

臘殘滕六不歸家白晝乘風撒玉沙旋種瓊田茁瑤草  
更栽琪樹看銀花

雪吹醉面不知寒  
信脚千山與萬山  
天甃瑤階三百里  
更飛柳絮與君看

山居雪後

春近能餘幾許寒  
雪花纔落便消殘  
青松根上蘭根下  
猶得三朝兩日看

一點紅塵未敢生  
松間雪後政堪行  
日光半破風微度  
時作高林落果聲

誠齋集卷十四


謹案卷十三第九頁前七行船泊小灣春已殘按此句回  
讀似牽強疑已字是色字之訛

卷十四第七頁前一行寄詩北阮賒秋色按宋詩  
鈔阮作院

第十頁後六行鏡明不是人間秋按宋詩鈔明作  
湖



欽定四庫全書



總校官庶吉士臣張能照

校對官庶吉士臣陳文樞

謄錄監生臣周學澐